

MEJA BUNDAR EKONOMI SINGAPURA

S'pura perlu perkuat daya tahan asas pendapatan: Lawrence Wong

Pastikan tiada warga yang dikecualikan daripada meraih faedah pertumbuhan

KEHIDUPAN rakyat Singapura dan anak-anak mereka akan menjadi lebih baik secara bertahap-tahap, dan tiada sesiapa pun – dan tiada golongan pun – yang tidak berganjak atau rasa terkecuali daripada manfaat pertumbuhan, kata Menteri Kewangan Lawrence Wong semalam.

Pelaburan dalam usaha mengurangkan ketidaksamaan dan mempertingkatkan mobiliti sosial memerlukan perbelanjaan tetap.

Untuk menangani keperluan perbelanjaan yang meningkat itu, Singapura perlu memperkuatkan daya ketahanan asas pendapatannya, tambah beliau.

“Kita mesti terus mengurangkan ketidaksamaan dan menggalak mobiliti sosial lebih besar dalam kalangan semua segmen masyarakat dan sepanjang kehidupan bekerja (orang ramai)... Semua usaha ini akan memerlukan lebih banyak pembiayaan berulang.

“Namun, ini adalah bidang di mana Kementerian Kewangan (MOF) tidak akan teragak-agak untuk berbelanja – untuk melabur dalam kemajuan dan kesejahteraan rakyat kita, untuk mengurangkan ketidaksamaan dan mempertingkatkan mobiliti sosial, dan untuk menentang kecenderungan bagi sebuah masyarakat matang menjadi bersusun lapis membentuk kelas-kelas.

“Ini adalah asas komitmen kita kepada rakyat Singapura,” kata beliau.

Encik Wong memberi jaminan itu kepada semua rakyat Singapura sedang beliau membentangkan strategi fiskal Singapura dan pemikiran di sebaliknya di acara Meja Bundar Ekonomi Singapura Ke-35 oleh Institut Pengajian Dasar (IPS).

Acara meja bundar itu mengumpulkan ahli ekonomi sektor swasta kanan, ahli akademik, pemimpin perniagaan dan penggubal dasar untuk membincangkan isu dasar makroekonomi yang dihadapi Singapura.



ENCIK LAWRENCE WONG

Encik Wong berkata Singapura telah berjaya sejauh ini dalam mengendalikan dasar fiskal yang cermat dan berkesan.

Namun, tugasnya hanya akan menjadi lebih mencabar, memandangkan terdapat tiga cabaran utama atau “lengkung” yang akan menentukan trajektori strategi fiskal negara ini.

Ini adalah: isu memecahbelahkan yang semakin meluas, dan ancaman terhadap perpaduan sosial apabila terdapat kelebihan sekumpulan kecil orang; penduduk semakin menua, yang bermakna tenaga kerja semakin susut dan keperluan lebih besar bagi penjagaan kesihatan dan penjagaan lanjut usia; serta perubahan iklim – cabaran yang memerlukan tindakan segera hari ini meski-

pun jika kesan terburuknya hanya akan dirasakan berdekad dari sekarang.

Seperti negara lain, Singapura akan memerlukan lebih banyak sumber fiskal untuk menangani cabaran ketidaksamaan, demografi dan pelepasan karbon dengan berkesan, kata beliau.

Matlamatnya adalah untuk membina sebuah masyarakat yang lebih adil, dengan setiap anak boleh mencapai impiannya dan setiap pekerja boleh rasa bangga dan yakin, dan setiap individu diterima tidak kira latar belakang sosial atau usia, kaum atau agama.

“Namun, bagaimana kita dapat memastikan sumber yang mencukupi tanpa membebankan generasi kita yang sekarang atau masa depan? Itu persoalan yang membuat ramai menteri kewangan terjaga pada waktu malam.

“Ini bermakna kita mesti sedar tentang tanggungjawab besar yang dimiliki pemerintah sebagai penjaga sumber kita.

“Apa yang telah kita warisi semalam, kita mesti menjaganya dengan bijak; apa yang telah diamahankan kepada kita hari ini, kita mesti menggunakannya secara bertanggungjawab,” kata beliau.

Encik Wong, antara lain, berkata Singapura telah membuat kemajuan baik dalam mobiliti sosial.

Satu kajian MOF pada 2015 mendapati bahawa dalam kalangan kanak-kanak yang dilahirkan dari 1978 hingga 1982 kepada ibu bapa dalam golongan pendapatan 20 peratus terbawah, 14.3 peratus daripada mereka mara ke dalam golongan pendapatan 20 peratus teratas dalam kalangan rakan sebaya yang berusia 30-an tahun – lebih tinggi berbanding perangkaan bagi negara lain di Amerika Utara dan Eropah.

Data itu dikemas kini baru-baru ini bagi kanak-kanak yang dilahirkan dari 1985 hingga 1989, dan peratusannya ialah 14 peratus – rendah sedikit tetapi tetap lebih baik daripada banyak tempat lain, kata beliau.